



Chësc ultim fin dl'edema él gnü sughé le tan aspeté derby ladin anter le ACD Val Badia y La Val.

Na partida combatüda y emozionanta cina la fin, la VB defënn indere le resultat y se tëgn toch i trëi punc.

Al gran publich apascioné ruvé adalerch al bel ciamp “Pradel” a San Martin él gnü pité na partida ezitënta cina le sciür dla fin. Dal punt d’ odüda dla determinaziun y dl’intesivité de jüch ti va n gran complimënt a trames formaziuns, che á dé düt y deplö por fa le resultat. La Val mëss se sotmët al jüch dla VB dl pröm tēmp mo se refesc spo tla secunda pert, protagonist é chiló le un dla VB Ferdigg che desfantëia n önescmetri.

Derevers ala partida, sciöche bele anuzé danfora, stënta La Val a se sbloché y mëss tl metēman se sotmët al jüch avversar. Le mezciamp süga bun le palê y le defensciun dl La Val é scialdi sforzada a trá demez. Val ripartënza ti gareta indere ince ai ghesc, Alex E. se fej lerch sön la pert ciampa y mët amez n bel preparatif bass che passa fora por düta l’area, i atacanc indere ne röia nia a tra te porta. Ala chert’ora respogn la VB y desliëia le grop cun Manuel Clara sön na diatenziun di ghesc. Le palê vëgn pordü a mezciamp y la passaja filtranta che taia fora la defenjiun ti röia sön le pé a Clara. Chësc ultim pó jí sú cuntra porta y vega la trata bassa sön le pé de porta lunch, le verda porta Sepl ne röia nia a devié le curan. Dal atra pert dl ciamp vëgn na trata a bót sigü cuntra porta de Stefan deviada dal defensur y ti röia sön le pé a Alex che vega ciamó n iad, ince chësta de püch dlungia porta ia. La defenjiun da La Val mëss ciamó tramoré sön val puniziun y trates dal ciantun, ulache i stersc atacanc é rîs da tigní y manacia a radopié le resultat.

Trames scuadres va tla palsa a ciarié nöies forzes, le pröm tēmp se rüva sön le resultat de 1 a 0 por la VB.

Le sceter dla partida i passa spo tla secunda fraziun tles mans ai ghesc da La Val. Na gran presciun sön i portadûs dl palê fej alzé düta la squadra y bel do püc menüc röia le jonn Christian Dapoz al limit a tra cuntra porta. Püch dô vëgn architê le jüch por n contrast grô, daulache le atacant da La Val Alex y le defensur dla VB Davide röia a bat adüm le ce sön n stach. Tartan che i sogadús mëss lascé le ciamp da jüch conzed l'arbiter al 60[^] n önescmetri por fal de man da pert dl defensur dla VB. Na gran ocasiun por avalué le resultat; Alex röia indô te ciamp y se prejentëia sön le punt di önescmetri.

Le portier Ferdigg individuëia chilò bun la direziun dla trata y alontenëia insciö le palê cun i pîsc. Sot i scrai de esultanza dl publich vëgnel sughé inant y La Val pro da mêt da pert l'ocasiun arjumada por porvé danü a ataché. Al 70[^] é la gran reaziun y reflés de Ferdigg che ti dij indô de no ala trata de Stefan. Le medemo vëgn sorví cun na passaja bassa al limit y pro la trata al jore sön le pé lunch, Ferdigg sprinza da na pert y cöi fora cun les pizes di dëic. Martin Ploner apëna rové te ciamp pro ince ciamo na trata sëcia da lungia distanza cuntra porta, le palê röia de püch sura la stangia fora. An cunësc che les forzes se röia ince y al dërt momënt anuzëia la VB le momënt de deblëza por castighé zeruch, n gran druch cuntra porta ni fej indere nia ruvé a contlujun. Atres gran ocajiuns ne é nia plö da alzé fora y l'arbiter fej ruvé i nonanta menüc. Le resultat defenü i fej gran parüda ala VB ince sce le pêr foss sté plö co iüst.

ACD Val Badia – US La Val : 1 - 0

Formaziun La Val: 1. Sepl Kantioler, 2. Egon Frenes (dal 45[^] Luca Pescollderung), 3. Werner Sottara (dal 50[^] Martin Ploner, dal 75[^] Felix Nagler), 4. Paolo Vallazza, 5. Marco Castlunger, 6. Franz Tolpeit (dal 45[^] Christian Dapoz), 7. Max Nagler, 8. Stefan Sottara - capitän, 9. Adrian Miribung (dal 70[^] Michele Campeï), 10. Alex Elzenbaumer, 11. Marco Sottara

Gol por la Val Badia: Manuel Clara al 16[^]

Proscimes partidas:

La Val süga en domënia ai 18 de otober dales 15:30 te ciasa cuntra le Gsiesertal

La Val Badia süga en domënia ai 18 de otober dala medema ora a Niederdorf cuntra la squadra de ciasa

[Resultac dles atres scuadras](#)

Insëra, mercuri ai 23 de aurì él gnü sughé l'andata dla semifinala de Copa Provinzia contra la squadra da Ritten, che süga le campionat trê te 3 categoria mo te n ater girone. La squadra da La Val à incuntè na squadra sterscia, che à lascè udèi sües cualitès portan a ciasa la devènta por 2 a 0. Ai 7 de mà gnaral sughé le ritorno sön le ciamp dl Ritten.